



Foreign  
Investors  
Council

2020/2021

# VSI GODIŠNJAK

---

## SADRŽAJ

VIJEĆE STRANIH  
INVESTITORA U BIH  
GODIŠNJAK

---

VSI događaji • S. 2

---

Ostali događaji • S. 5

---

VSI inicijative • S. 7

---

Sastanci • S. 10

---


Saradnja • S. 13

---

## WEBINAR - IZAZOVI POSLODAVACA U TOKU COVID-19 PANDEMIJE

Vijeće stranih investitora u BiH i Vanjskotrgovinska komora BiH organizovali su 23. aprila 2020. Webinar pod nazivom „Izazovi poslodavaca u toku COVID-19 pandemije sa aspekta radnog prava i zaštite ličnih podataka“, koji je održan putem Zoom online platforme, sa početkom u 10 sati. U toku webinara razmatrana su različita pitanja od interesa za poslodavce koja su postala aktuelna kao posljedica pandemije COVID-19 koja pored opasnosti za zdravlje radnika donosi sa sobom i izazov opstanka na tržištu za mnoge kompanije. Cilj webinara bio je da se unaprijedi znanje u oblasti radnog prava i zaštite ličnih podataka te da učesnici međusobno razmjene iskustva u ovoj vrlo aktuelnoj oblasti u trenutku kada se suočavamo sa velikim izazovima. Webinar je bio namjenjen radnicima, poduzetnicima, direktorima i menadžerima.

## WEBINAR - E-TRGOVINA U BOSNI I HERCEGOVINI



Vijeće stranih investitora u Bosni i Hercegovini i Vanjskotrgovinska komora Bosni i Hercegovini organizirali su 26.10.2021. godine, putem Zoom platforme/aplikacije webinar na temu „E-trgovina u Bosni i Hercegovini: kreiranje online prodavnice (web shopova), prednosti, nedostaci, modeli i načini plaćanja u online trgovini“. Cilj webinara je bio unaprjeđenje znanja polaznika u oblasti online trgovine sa različitih aspekata, te međusobna razmjena iskustva polaznika u ovoj vrlo aktuelnoj oblasti u trenutku kada se suočavamo sa velikim izazovima. Imajući u vidu visok nivo interakcije, razmjene iskustava i brojna postavljena i odgovorena pitanja, sa zadovoljstvom se može konstatovati da je cilj webinara ispunjen. U uvodnom obraćanju polaznicima webinara se obratila gđa. Sanja Miović, izvršna direktorica Vijeća stranih investitora BiH, te upoznala prisutne sa radom, aktivnostima, ciljevima, misijom i vizijom Vijeća stranih investitora. Direktorica VSI Miović se zahvalila prisutnima na velikom odzivu i izdvojenom vremenu za prisustvo ovom webinaru. 127 prisutnih polaznika na webinaru najbolji je pokazatelj koliko je ova tema aktuelna. Polaznicima webinara se ispred Instituta za edukaciju Vanjskotrgovinske komore BiH obratio i gđin. Mirza Konjo, te istakao da je pandemija koronavirusa ubrzala implementaciju mnogih aktivnosti sa prefiksom ‘e’, poput e-trgovine, e-learninga, itd. U vremenu izazova i krize, posjedovanje e-trgovine je bio ključ za prezentiranje proizvoda i usluga potencijalnim kupcima.

## USPJEŠNO ZAVRŠEN PRVI SKUP "GLOBAL BUSINESS EXECUTIVE RETREAT 2021"

Prva konferencija pod nazivom Global Business Executive Retreat 2021, koja se održala u periodu od 1. do 4. jula na planini Jahorina u organizaciji Agencije za unapređenje stranih investicija u BiH i Vijeća stranih investitora u BiH (FIC), a pod pokroviteljstvom Ministarstva spoljne trgovine i ekonomskih odnosa Bosne i Hercegovine, uspješno je završena. Na konferenciji je, tokom tri dana koliko je trajala, učestvovalo stotinu učesnika iz različitih dijelova svijeta, kao i više od trideset panelista i glavnih govornika, koji su kroz zanimljive panele obradili temu slobodne zone, inovacije i preduzetništvo, digitalizacija kao i temu turizam danas. Prvog dana konferencije održana je panel diskusija vezana za uspostavljanje slobodnih zona u Bosni i Hercegovini po modelu najpoznatijih slobodnih zona u svijetu i regiji. Na ovom panelu pored ministra vanjske trgovine i ekonomskih odnosa BiH, Staše Košarca, učestvovao je i predsjednik Vijeća stranih investitora, Branimir Muidža, te dva glavna govornika, Zoë Harries, viša savjetnica za direktna strana ulaganja i specijalne ekonomske zone i direktorica projekta Svjetske organizacije za slobodne zone iz Dubaija (FZO), Harries je stručnjak za konkurentnost zona i poslovno modeliranje i nalazi se na čelu Svjetskog savjetodavnog odjela za FZO i podržava vlade, posebne ekonomske zone i poslovne parkove u privlačenju stranih investicija.

### DATE PREPORUKE ZA OPORAVAK TURIZMA I PRIVLAČENJE STRANIH INVESTITORA

Drugog dana konferencije održane su panel diskusije posvećene visokim tehnologijama i inovacijama koje su u službi razvoja i unapređenja preduzetništva. Jedan od glavnih govornika bio je Martin Mössler, generalni direktor Science Park Graz iz Austrije i generalni direktor ESA Space Solutions, jedan od najvećih evropskih stručnjaka za oblast inovacija i započinjanja biznisa koji uspješno vodi i razvija oko 60 startupa godišnje. Poseban značaj konferenciji dalo je učešće predstavnika investitora iz Zapadne Afrike i osnivača i predsjednika Poslovne Asocijacije Centralno-Istočne Evrope i Zapadne Afrike (CEEWABA), Michael A. DADA, koji je prepoznao potencijal naših kompanija i ukazao na značaj uspostavljanja bliskih poslovnih veza sa zemljama Zapadne Afrike, prije svega Nigerije i Gane. Trećeg dana konferencije razgovaralo se o temi "Turizam danas", na kojoj su učestvovali predstavnici turističkih zajednica i organizacija iz Sarajeva i Opštine Pale. Global Business Executive Retreat 2021 ispunio je sva očekivanja organizatora i učesnika i stvorio odličnu platformu za razmjenu iskustava i najboljih poslovnih praksi, ali i za umrežavanje i započinjanje saradnje renomiranih stručnjaka i eminentnih imena sa globalne ekonomske i političke scene, saopštili su organizatori.



## KONFERENCIJA ESG Environmental/Social/Governance

Vijeće stranih investitora u Bosni i Hercegovini (FIC), AIRE Centar i Sustineri Partners organizovali su konferenciju "Okolišni, društveni i standardi korporativnog upravljanja (ESG) i Zapadni Balkan – Prema održivom poslovanju" u Sarajevu. Skup je, pored učesnika u sali, pratilo i oko 200 učesnika putem online platforme. "Vijeće stranih investitora u Bosni i Hercegovini je posvećeno povezivanju cijelog regiona s ciljem praćenja novih standarda i obaveza, koji posebno mogu da utječu na poslovanje stranih kompanija i velikih izvoznika. Saradnja sa AIRE Centrom i Sustineri Partners nam omogućava da preuzmemo znanja iz cijele Evrope, prepoznamo šta su mogućnosti kompanija ovdje i iskoristimo ESG standarde, ne kao obavezu, već kao izazov i priliku", poručila je Sanja Miović, izvršna direktorica FIC-a. Konferenciju su otvorila uvodna obraćanja koja je moderirala Elma Veledar Arifagić iz kompanije "dmb consulting". Ambasador Ujedinjenog Kraljevstva u Bosni i Hercegovini Matt Field otvorio je skup, izrazivši podršku ciljevima konferencije. Programska direktorica AIRE Centra za Zapadni Balkan, Biljana Braithwaite je dodala: "Za nas koji smo već duži niz godina prisutni u regionu i radimo na unapređenju vladavine prava i zaštite ljudskih prava u nastojanju da Zapadni Balkan odgovori na izazove koje donose evropske integracije i šire globalno povezivanje, tema današnjeg skupa predstavlja dugoočekivani iskorak jer govorimo o odgovornosti poslovnog sektora, i doprinosu koji on može dati u ovim procesima." Konferencija je okupila predstavnike kompanija sa iskustvom uvođenju i praćenju ESG standarda u svom poslovanju na Zapadnom Balkanu, predstavnike ključnih međunarodnih organizacija i finansijskih institucija, te brojne međunarodne stručnjake za ESG standarde u Evropi. Na prvom panelu "ESG – put za održivi rast i investicije" govorili su rezidentna koordinatorica UN-a u BiH dr. Ingrid Macdonald, šef ureda Svjetske banke za BiH i Crnu Goru Christopher Sheldon, šefica ureda IFC-a za BiH Lada Buševac, šefica ureda EBRD-a za BiH Manuela Naessl i Herman Bril, direktor Arabesque Asset Management. Rukovodioci ključnih finansijskih investicija ohrabрили su nastavak aktivnosti na promociji ESG standard u zemlji i regionu. U nastavku programa uslijedila je prezentacija o ulozi ESG-a u bankarskom sektoru a govorio je Gieseppe Zammarachi, šef Odjela za održivost i ESG politike UniCredit grupacije. Popodnevnu diskusiju "Zapadni Balkan i ESG standardi: Prilika ili neophodnost" moderirala je Marija Jovanović, profesorica na Univerzitetu u Essexu i stručnjakinja u oblasti pitanja zaštite ljudskih prava u biznis sektoru. Po okončanju diskusija, programska direktorica AIRE Centra za Zapadni Balkan je moderirala završnu diskusiju i usvajanje zaključaka, u čemu je učestvovalo preko 200 sudionika online i 50 gostiju koji su imali priliku uživo pratiti konferenciju u Sarajevu.



## VIJEĆE STRANIH INVESTITORA NA „EXPO 2020 DUBAI“

Bosna i Hercegovina jedna je od 192 zemlje koje su se ove godine u Dubaiju predstavljale na najstarijoj i najprestižnijoj izložbi EXPO 2020, u periodu od oktobra 2021. do kraja marta 2022. godine. U okviru programa ove izložbe svaka zemlja učesnica ima predviđen i Nacionalni dan, pa tako i Bosna i Hercegovina. Nacionalni dan Bosne i Hercegovine na Expo Dubai 2020 obilježen je 18. decembra 2021. godine, a ceremonija podrazumijeva i obraćanje zvaničnih predstavnika delegacije Bosne i Hercegovine i svečani kulturno – umjetnički program u paviljonu Bosne i Hercegovine. Kao član Organizacionog odbora EXPO 2020 BiH, tim povodom, u Dubaiju je boravila i izvršna direktorica VSI, Sanja Miović u sklopu delegacije Bosne i Hercegovine koju predvodio predsjedavajući Predstavničkog doma Parlamentarne skupštine BiH Denis Zvizdić. Pored predstavnika Vijeća stranih investitora delegaciju su činili predsjednik Organizacionog odbora EXPO 2020 BiH, ministar privrede KS Adnan Delić, ambasador BiH u Ujedinjenim Arapskim Emiratima Šerif Mujkanović, premijer Kantona Sarajevo Edin Forto, ministrica za nauku, visoko obrazovanje i mlade Aleksandra Nikolić, ministrica turizma FBIH Edita Đapo, kao predstavnik akademske zajednice, prof.dr. Vjekoslav Domljan, te Emir Granov, u funkciji predstavnika državnog investicijskog fonda Dubaija i poslovne zajednice. Članovi delegacije BiH, tokom boravka u Dubaiju, susreli su se sa predstavnicima potencijalnih investitora i drugih vlada, s ciljem povezivanja kako s vladama, tako i s predstavnicima globalne poslovne zajednice. Predstavnici poslovne zajednice u nedjelju, 19. decembra 2021. godine, prisustvovali su na Country Business Briefingu (CBB) Bosne i Hercegovine, gdje su imali priliku zainteresovanim učesnicima ovog skupa predstaviti komparativne prednosti koje BiH nudi u oblasti poduzetništva, malih i srednjih preduzeća, kao i atraktivnih projekata u sektorima transporta, energetike, informatike, drvne i metalske industrije, poljoprivrede, i naravno u sektoru turizma. Važno je istaknuti da su se predstavnici poslovne zajednice, koji su učestvovali na CBB, odazvali na poziv koji im je uputio predsjednik Organizacionog odbora, ministar Delić u saradnji s Vanjskotrgovinskom komorom BiH, Udruženjima poslodavaca BiH, entiteta FBIH i RS-a, te Distrikta Brčko i Vijećem stranih investitora (FIC).



## VSI UČESTVOVALO NA SARAJEVO UNLIMITED FORUMU

Vijeće stranih investitora u BiH učestvovalo je i podržalo organizaciju Foruma inovacija, tehnologija i poduzetništva "Sarajevo Unlimited", koji su održani tokom 2020. i 2021. godine. Pod sloganom Adaptabilnost u novom dobu. Sarajevo Unlimited je postala odlična platforma za povezivanje poduzetnika, inovatora i kompanija, iz BiH, regiona i svijeta, koja se dešava jednom godišnje. Teme foruma u 2020. godini bile su u fokusu novonastale situacije uzrokovane COVID-19 pandemijom, naročito ulaganja u tehnologiju, uključujući usklađeniji i rašireniji prelazak na digitalne forme, ulaganje u pametne gradove za podršku otpornosti zajednice, prelazak na virtuelne radne prostore i prakse, te maksimalno uključivanje i prihvatanje novih sistema kako bi krenuli naprijed. U 2021. godini zainteresirana publika imala je priliku da čuje poznate govornike iz oblasti digitalizacije, tehnologije i inovacija. Vijeće stranih investitora je kao prijatelj foruma finansijski podržao Sarajevo Unlimited u protekle dvije godine.

## VSI NA EKONOMSKOM FORUMU BIH 2020



Ekonomski fakultet Univerziteta u Sarajevu 5. marta 2020. godine po četvrti put je organizovao Ekonomski forum Bosne i Hercegovine 2020. Na ovom događaju, kao i prethodne tri godine, učešće su uzeli predstavnici izvršnih vlasti u Bosni i Hercegovini, predstavnici regionalnih kompanija, diplomatskog kora i akademske zajednice. Glavni govornik (keynote speaker) Foruma 2020 je dr. Jeffrey Sachs, specijalni savjetnik generalnog sekretara Ujedinjenih nacija za ciljeve samoodrživog razvoja i profesor Univerziteta Columbia. Panelisti prve sesije su bili predstavnici inicijative Western Balkans 2020, a njihova diskusija je tretirala pitanja ciljeva održivog razvoja u kontekstu zemalja Zapadnog Balkana. O stanju u zemljama regije i šta zajedno ove države mogu učiniti s ciljem unapređenja ekonomskog i poslovnog ambijenta. Govornici prvog panela bili su: Jadranka Kosor, premijerka Hrvatske 2009-2011.; Filip Vujanović, predsjednik i premijer Crne Gore 2013-2018.; Mirko Cvetković, premijer Srbije 2008-2012.; Fadil Novalić, aktuelni premijer Federacije Bosne i Hercegovine. Moderator prve sesije je bio prof. dr. Zlatko Lagumdžija. O značaju digitalnog razvoja i budućnosti digitalne na području regije zapadnog Balkana, s osvrtom na bankarski sektor, u drugoj sesiji su govorili predstavnici banaka i IT-sektora u BiH i Hrvatskoj: Jasmin Mahmuzić, direktor Agencije za bankarstvo Federacije BiH; Boško Mekinjić iz Upravnog odbora Udruženja banaka BiH; Martina Drvar, viceguvernerka Hrvatske narodne banke; Mersed Čamdžić, direktor kompanije Mistral, te Amina Karić, dopredsjednica operacija kompanije Authority Partners. Moderator druge sesije je bio Branimir Muidža, predsjednik Vijeća stranih investitora u BiH.

## UVAŽENA INICIJATIVA O IZMJENI I DOPUNI ZAKONA O POREZU NA DOBIT FBIH

Federalno ministarstvo finansija aktom broj: 05-02-4-8738/19-1 informisalo je Vijeće stranih investitora u BiH da je Vlada Federacije Bosne i Hercegovine na svojoj 206. redovnoj sjednici, dana 16.01.2020. godine, usvojila Prijedlog zakona o izmjenama i dopunama zakona o porezu na dobit po hitnom postupku, i uputila prema parlamentu Federacije BiH, te da je Inicijativa za izmjenu i dopunu Zakona o porezu na dobit koju je VSI uputilo Ministarstvu finansija, uvažena prilikom pripreme prijedloga Zakona. Inače, inicijativa VSI-a upućena krajem prošle godine Ministarstvu ukazuje na potrebu hitnog rješavanja problema negativnih efekata koji se javljaju primjenom novog međunarodnog računovodstvenog standarda MSFI 16. Od 1. januara 2019. godine u FBIH je u obaveznoj primjeni novi računovodstveni standard, MFSI 16 – "Najmovi", čijim stupanjem na snagu je nestala razlika između priznavanja finansijskog i operativnog najma kod najmoprimca. Najmoprimci iz različitih industrija suočili su se sa značajnim efektima primjene novog standarda u vidu povećanja nekadašnjeg troška najma, koji se sada sastoji od troška amortizacije i kamate. Trošak je znatno veći u početnim godinama trajanja najma. Imajući u vidu trenutne odredbe Zakona o porezu na dobit FBIH, amortizacija je priznat trošak isključivo ukoliko se radi o sredstvima u vlasništvu poreznog obveznika. S tim u vezi, hitno su neophodne izmjene odredbi Zakona o porezu na dobit u FBIH, kojim bi se regulisao porezni tretman amortizacije sredstava koja će se primjenom MSFI 16 naći u knjigama najmoprimca. U inicijativi je predloženo pokretanje hitne procedure za izmjenu člana Zakona o porezu na dobit, koji reguliše amortizaciju i kamatu. Kao rezultat ove inicijative porezni obveznici bi blagovremeno (prije februara 2020.g.) dobili zakonski osnov za pravilan porezni tretman novonastalog troška amortizacije i kamate, koji su nastali primjenom MSFI 16, odnosno ne bi bili izloženi dodatnim troškovima poreza na dobit.

## INCIJATIVA ZA DOPUNU NOVOG PRAVILNIKA O PRIMJENI NOVOG ZAKONA O PDV-U BIH

Zasnovano na potrebama praćenja trendova suvremenog poslovanja, te težnji za uvođenjem zakonskih i sistemskih rješenja kojima će biti omogućeno efikasno praćenje porijekla i kvaliteta prometa dobara, kao poslovne i porezne prakse zemalja iz okruženja (Republika Srbija), a na temelju smjernica iz EU Direktive Vijeća 2006/112/EZ od 28.11.2006. o zajedničkom sistemu PDV-a, VSI je podnijelo Upravi za indirektno oporezivanje (UIO) Inicijativu za dopunu novog Pravilnika o primjeni novog Zakona o PDV-u BiH. Struktura Inicijative za dopunu novog Pravilnika o primjeni novog Zakona o PDV-u BiH sadrži: a) Opis Inicijative za dopunu novog Pravilnika o primjeni novog Zakona o PDV-u BiH, b) Shematski prikaz Inicijative u praksi i opis modela sa posebnim osvrtom na porezni dio, nastanak obaveze, izdavanje poreznog računa, evidencija u poreznim knjigama, c) Benefiti koji proizlaze iz usvajanja Inicijative, d) Primjer zemalja iz regiona (Republika Srbija, Republika Hrvatska i EU Direktiva 2006/112/EZ od 28.11.2006 o zajedničkom sistemu PDV-a, smjernice), e) Prilog. Cijeneći fleksibilnost i razumjevanje koje su članovi Upravnog odbora UIO BiH do sada pokazivali prema VSI i našim članicama uvažavajući naša zapažanja, stavove i prijedloge, nadamo se da će UIO biti i ovaj put spremna za suradnju sa poslovnom zajednicom u BiH, koja će u ovom konkretnom slučaju rezultirati povoljnim rješenjima na zadovoljstvo svih.

## VSI ULOŽILO AMANDMANE NA "KORONA ZAKON"

Nakon što je Vlada FBiH na vanrednoj sjednici održanoj 6. aprila 2020. godine utvrdila prijedlog Zakona o ublažavanju negativnih ekonomskih posljedica izazvanih COVID-19 pandemijom, te isti uputila na usvajanje po hitnom postupku u Parlament FBiH, članice Vijeća stranih investitora su dostavile parlamentarcima amandmane i komentare na predloženi Zakon kao i prijedloge mjera, koje bi imale značajniji, pozitivan uticaj na održavanje ekonomske aktivnosti i finansijske stabilnosti kompanija.

### VSI JE ULOŽILO UKUPNO OSAM AMANDMANA

Stav VSI-a jeste da i pored dobre namjere Vlade FBiH da intervenira u spašavanje privrede u FBiH, ovim Zakonskim rješenjem ipak neće proizvesti zadovoljavajuće efekte, te da Zakon treba omogućiti stvarnu pomoć i finansijsku injekciju čitavom realnom sektoru. S tim u vezi, članovi VSI su u amandmanima predložili izmjenu člana 4. na način da poslovni subjekti obuhvaćeni ovim Zakonom imaju pravo na subvencioniranje minimalnih plaća i pripadajućih doprinosa na minimalnu plaću (doprinosi na teret osiguranika i doprinosi na teret poslodavca), općih vodnih naknada i naknada za osiguranje od nesreće, u skladu sa ovim zakonom u punom iznosu mjesečno, po svakom zaposlenom, počevši od obračuna i isplate bruto plaće za mjesec mart 2020. godine i svaki naredni mjesec, uključujući i obračun i isplatu plaća i za mjesec nakon prestanka stanja nesreće, ukoliko imaju pad ostvarenog prihoda 10% i više u odnosu na ostvareni prihod u uporednom periodu 2019. godine.

## VSI AKTIVNO SUDJELOVAO U DEBLOKIRANJU RADA KOMISIJE ZA VRIJEDNOSNE PAPIRE FBIH

Nakon skoro dvije godine blokade Komisija za vrijednosne papire FBiH dobila je nove članove, čime je deblokiran njen rad i omogućeno normalno funkcionisanje. U proteklih 20 mjeseci poslovna zajednica je na inicijativu velikog broja privrednih društava i banaka u više navrata alarmirala Parlament i Vladu Federacije BiH da je došlo do obustave rada Komisije za vrijednosne papire FBiH kao posljedice neimenovanja novih članova Komisije u Parlamentu FBiH. U tom upozorenju, FIC je zajedno sa svojim partnerima, ukazao na sve posljedice koje ovo opstruiranje normalnog funkcionisanja Komisije može imati na tržište kapitala u Federaciji BiH. Naime, blokada rada Komisije dovela je privredna društva iz FBiH, u nepovoljan položaj i uzrokovala direktnu materijalnu štetu iz razloga nemogućnosti da se sredstva koja su namijenjena i već operativna, investiraju na tržištu vrijednosnih papira. Obustava rada Komisije primarno je uticala na nemogućnost dokapitalizacije privrednih društava, sprječavajući ih da time ispune zakonske obaveze i izvrše jačanje kapitalne osnove. Zbog nemogućnosti rada Komisije na desetina miliona KM ulaganja u BiH je bilo na čekanju već duži vremenski period. Također, još jedna direktna posljedica blokade rada Komisije je ta da na registracijskim sudovima u FBiH, zbog nemogućnosti ishodovanja rješenja o promjenama članova Nadzornog odbora (čije ishodovanje je uvjetovano saglasnošću Komisije), dionička društva nisu mogla da izvrše ni promjenu sastava Uprave po odlukama Nadzornog odbora a što posljedično onemogućava normalno funkcionisanje poslovnih procesa. Zajednički, Vijeće stranih investitora u BiH, Udruženje banaka BiH, Udruženje poslodavaca FBiH i Privredna/Gospodarska komora FBiH kao institucionalni predstavnici poslovne zajednice tokom 2021. godine, intenzivno su radili na otklanjanju ovog problema što je rezultiralo konačnom deblokiranju rada Komisije.

## RJEŠAVANJE PROBLEMA PORESKOG TRETMANA ISPRAVKE VRIJEDNOSTI POTRAŽIVANJA BANAKA U FBIH

Vijeće stranih investitora u BiH uputilo je inicijativu Federalnom ministarstvu financija i Agenciji za bankarstvo FBiH u vezi otvorenog pitanja ujednačavanja propisa i poreznog tretmana na nivou oba entiteta. Upravo ova neujednačenost poreznih propisa u BiH, dovela je u neravnotežan položaj banke koje su članice iste grupacije, a u BiH posluju kao zasebni poslovni subjekti u dva entiteta. Naime, negativni efekti poreznog tretmana ispravke vrijednosti potraživanja na poslovanje banaka u FBiH zbog neusklađenosti propisa ogleda se u tome što u FBiH, postoji suštinska razlika u definiranju nivoa kreditnog rizika 2, u propisima FBA i Zakonu o porezu na dobit FBiH, a time ujedno i razlika sa propisima RS-a. Neharmoniziranost poreznih propisa unutar entiteta i među entitetima, nažalost, za posljedicu imaju negativne efekte na poslovanje banaka, naročito onih koje pripadaju istoj grupaciji, a imaju pravna lica/poslovnice u oba entiteta. U ovom slučaju banke iz Federacije zbog neravnotežnog tretmana i pristupa u oporezivanju trpe negativne ekonomske posljedice i suočavaju se sa problemom vođenja dvostrukih evidencija. Oslanjajući se na dosadašnju uspješnu suradnju VSI-a sa ove dvije institucije, tokom 2021. godine održane su serije sastanaka sa ciljem otklanjanja zakonskih kolizija i harmonizacije poreznih propisa u oba entiteta.



### VSI UČESTVOVAO U IZRADI STRATEGIJE RAZVOJA KANTONA SARAJEVO 2021-2027

Na poziv Zavoda za planiranje razvoja Kantona Sarajevo (KS), predstavnici Vijeća stranih investitora učestvovali su na online radionicama sa temom definisanja prioriteta i mjera u oblasti ekonomskog razvoja i tržišta rada u svrhu izrade Strategije razvoja Kantona Sarajevo 2021-2027., a koje su održane 2. i 3. novembra 2020. godine. Pored predstavnika VSI na održanim radionicama su učestvovali i predstavnici privrednih komora, razvojnih agencija, resornih ministarstava kao i predstavnici realnog sektora. Na online radionicama učesnici su utvrdili sljedeće prijedloge prioriteta i mjera u oblasti tržišta rada: Efikasnije posredovanje u zapošljavanju; Jačati funkciju posredovanja i unaprijediti reputacijski kapital službe za zapošljavanje KS; Aktivirati dugoročno nezaposlene osobe i povećati efektivnu ponudu radne snage; Povećati učinkovitost aktivnih mjera zapošljavanja. Kada su u pitanju prijedlozi prioriteta i mjera u oblasti ekonomskog razvoja, učesnici radionice su zaključili da fokus Kantona Sarajevo u narednih pet godina mora biti na implementaciji sljedećih mjera: Kreiranje okruženja poticajnog za poslovanje; Povećati efikasnost administrativnih procedura; Smanjenje fiskalnog i parafiskalnog opterećenja za poslovne subjekte; Razvoj preduzetničke infrastrukture; Jačanje konkurentnosti i izvozne orijentacije poslovnih subjekata; Unaprijediti tehnološku infrastrukturu i inovativnost poslovnih subjekata; Povećati digitaliziranost ekonomije; Podsticati digitalnu transformaciju poslovnih subjekata; te Jačati podršku razvoju IT sektora i kreativnih industrija.

Tokom posjete članova Evropske Komisije (DG ECFIN, DG NEAR i DG Employment) Bosni i Hercegovini u sklopu procjene Programa ekonomskih reformi Bosne i Hercegovine za 2020. godinu, održan je sastanak i sa predsjednikom VSI, Branimirom Muidžom. Povod sastanka bila je činjenica da su u maju 2019. godine zemljama kandidatima i potencijalnim kandidatima za članstvo u EU dostavljene revidirane smjernice za pripremu Programa ekonomskih reformi i zemlje su pozvane da pomenuti dokument dostave Evropskoj Komisiji do 31. januara 2020. godine. Ovaj proces će se ponavljati svake godine, tako da će ocjena voditi pripremi seta ciljanih smjernica u domenu politika i redovnom razmatranju implementacije politika. Cilj je da se osigura da saznanja stečena u toku jednogodišnjeg procesa direktno ulaze u sljedeći process, kako bi se postiglo kontinuirano unaprjeđenje ekonomske politike. Na sastanku je razgovarano i o stavovima poslovne zajednice o aspektima koji bi zaslužili posebnu pažnju Komisije prilikom pripreme ovog ekonomskog plana, posebno stavova koji se tiču glavnih prepreka poslovanju sa EU i u regiji u oblasti trgovine robom i uslugama, carinjenja, e-trgovina.



## ODRŽAN SASTANAK SAVJETA ZA STRANE INVESTITORE FBIH

Sveobuhvatan analitički osvrt na problematiku stranih ulaganja u Federaciji BiH u godini projicirane globalne svjetske recesije nastale zbog pandemije COVID-19 bila je osnovna tačka sedme sjednice Savjeta za strane investitore FBIH koja je održana 24. juna putem video-linka u sjedištu Vlade FBIH u Sarajevu pod predsjedavanjem federalnog ministra trgovine Zlatana Vujanovića.

**"SVAKA KRIZA JE I ŠANS DA SE SITUACIJA STABILIZIRA I EKONOMIJA OPORAVI, PRIJE SVEGA PRIVLAČENJEM STRANIH INVESTICIJA I POVOLJNIJIM POSLOVNIM AMBIJENTOM"**

Prema podacima koje je iznio član Savjeta i savjetnik federalnog premijera Goran Miraščić, procjena je da će recesija u FBIH iznositi od minus 3,2 do 5 posto, a ako se uzme u obzir da je prije izbijanja pandemije planirani rast BDP-a bio 2,8 posto, onda bi iznos pada iznosio između šest i osam procenata. Međutim, kako je istakao, svaka kriza je i šansa da se situacija stabilizira i ekonomija oporavi, prije svega zaustavljanjem negativne spirale privlačenjem stranih investicija i povoljnijim poslovnim ambijentom. Ustvrdivši da je svjetska ekonomija pokazala nerezistentnost nakon pojave pandemije korona virusa, predsjednik Vijeća stranih investitora BiH i član Savjeta Branimir Muidža je iznio primjer Tvornice cementa Kakanj/Heidelberg Cement Group čiji je generalni direktor, koja je i u periodu pandemije, i pored svih poremećaja, zabilježila rekordnu proizvodnju, prodaju i izvoz. Gotovo jednoglasna ocjena svih učenika u raspravi je da je, pored svih negativnosti koje je pandemija donijela, ovo i šansa da ekonomija u FBIH ojača, restrukturira se i uz poboljšanje poslovnog ambijenta i usvajanje neophodne zakonske regulative, zauzme poziciju koja će omogućiti značajnije strane investicije.

## VSI ODRŽAO SASTANAK SA GRADONAČELNIKOM ZVORNIKA



„Zvornik je u ovoj godini učinio dodatni napredak kada je dobijen Sertifikat povoljnog poslovnog okruženja (BFC) i kada su mnoge procedure za potencijalne investitore pojednostavljene,“ rekao je gradonačelnik Zvornika Zoran Stevanović nakon sastanka sa izvršnom direktoricom Vijeća stranih investitora Sanjom Miovčić. Na sastanku je razgovarano o mogućnostima investiranja u gradu Zvorniku, saradnji sa postojećim investitorima, te aktuelnim investicionim projektima. Posebna tema sastanka bila je inicijativa otvaranja slobodne zone na području grada Zvornika, koji zbog blizine granice sa Republikom Srbijom ima odličan potencijal za olakšan spoljno-trgovinski promet, a time bi se omogućilo otvaranje značajnih radnih mjesta u ovom gradu. Direktorica Vijeća stranih investitora, gospođa Miovčić istakla je da bi uspostavljanje i unapređenje režima slobodnih zona u Republici Srpskoj dovelo i do povećanja iznosa direktnih stranih investicija. „Slobodne zone kao integralni dio spoljno-trgovinske politike predstavlja izuzetan mehanizam za privlačenje stranih investicija. Iskustva iz regiona Zapadnog Balkana pokazuju da slobodne zone privlače značajan broj stranih investitora koji trenutno igraju važnu ulogu u ekonomijama ovih zemalja,“ – rekla je Miovčić. Nakon održanog sastanka delegacija je posjetila švajcarsku kompaniju „Zeohem“ koja je 2018. godine u Zvorniku otvorila fabriku i pokrenula proizvodnju za preradu zeolita i hromatografskih gelova. U realizaciju ove investicije uloženo je više od devet miliona švajcarskih franaka.



Članice Vijeća stranih investitora u BiH koje se bave distribucijom i prodajom dodataka prehrani i hrane za posebne namjene trenutno imaju problem koji se ogleda u nepotrebnom dupliranju prikupljanja dokumentacije za registraciju dodataka prehrani i hrane za posebne namjene u FBiH i u RS. Naime, prilikom procesa registracije kompanije su u obavezi da dva puta pripreme potrebnu dokumentaciju i dva puta plate naknadu za registraciju, u svakom entitetu posebno. Ovakva praksa stvara značajne troškove za kompanije na mjesečnom nivou, što u konačnici utiče i na cijenu samog proizvoda. Pored troškova, ovakva praksa stvara i poteškoće u radu kompanija jer su prinuđeni da za isti proizvod prikupe duplu dokumentaciju koju moraju predati na dva različita geografski udaljena mjesta (npr. odlazak u Banja Luku dva puta jednom zbog predaje zahtjeva, drugi put zbog preuzimanja stručnog mišljenja i odlaska u Ministarstvo na dalju obradu), u Federaciji BiH, odlazak u Federalni institut za javno zdravstvo, Nažalost, slična praksa je prisutna i kod registracije drugih robnih grupa poput hemikalija, biocida, zatim kod etiketiranja šarži i uvoza hrane životinjskog porijekla. Primjera radi, u Federaciji BiH se novi Zakon o hemikalijama (koji je usaglašen sa Zakonom o hemikalijama u RS i EU regulativama) ne primjenjuje, već je i dalje prisutna praksa koju propisuje stari Zakon o hemikalijama u FBiH. Zatim, kada su u pitanju šarže trošak etiketiranja po komadu iznosi 0,05KM, što prouzrokuje za kompanije dupli mjesečni trošak u iznosu od više hiljada konvertibilnih maraka samo za etiketiranje šarže. Nadalje, kod uvoza hrane životinjskog porijekla mnoge kompanije se suočavaju sa različitom praksom uvoza čiji je uzrok u nejasnim uputama Ureda za veterinarstvo BiH po pitanju deklarisanja proizvoda. Nejasna praksa i pravila dovode do nejednakog tretmana uvoznika.

## SASTANAK SA MINISTROM VANJSKE TRGOVINE I EKONOMSKIH ODNOSA BIH

Izvršna direktorica VSI-a, Sanja Miović održala je sastanak sa Ministrom vanjske trgovine i ekonomskih odnosa BiH, gospodinom Stašom Košarcem. Tema sastanka bila je unapređenja investicione klime i realizacija trenutnih investicionih projekata na teritoriji BiH, kao i načini jačanja suradnje između Vijeća stranih investitora i Ministarstva u oblastima koje su od interesa za strane investitore u zemlji, a koje su u okviru nadležnosti ovog ministarstva.

### **RAZGOVARANO O AKTUELNIM OTVORENIM PITANJIMA: DOZVOLE ZA INTERVENTNI UVOZ LIJEKOVA, BLOKADA RADA KOMISIJE ZA VRIJEDNOSNE PAPIRE FBiH, POJEDNOSTAVLJENJE ULASKA STRANACA NA MENADŽERSKIM POZICIJAMA SA PRIVREMENIM BORAVIŠNIM DOZVOLAMA**

Na sastanku je također razgovarano o aktuelnim otvorenim pitanjima kao što su: dozvole za interventni uvoz lijekova, blokada rada Komisije za vrijednosne papire FBiH, pojednostavljenje ulaska stranaca na menadžerskim pozicijama sa privremenim boravišnim dozvolama, sporne odredbe Zakona o zaštiti potrošača kao i o mnogim drugim pitanjima, koja su od ključnog značaja za efikasno poslovanje stranih investitora, naročito u novim uvjetima pandemije, a koja zahtjevaju prioritarno rješavanje radi omogućavanja normalnog i lakšeg poslovanja stranih kompanija i priliv novih investicija u BiH koje će osigurati značajan rast ekonomije i bolji standard građana BiH.



## VSI I DMB CONSULTING POSTALI PARTNER ZA ČEŠKE IZVOZNIKE U BOSNI I HERCEGOVINI

Kompanije iz Republike Češke u Bosni i Hercegovini moći će koristiti usluge firme dmb consulting i Vijeća stranih investitora u Bosni i Hercegovini (Foreign Investors Council), koji su postali češki partner za podršku ekonomskim aktivnostima u okviru novog programa PROPEA. Ova usluga je dio paketa pomoći Ministarstva vanjskih poslova Republike Češke, najavljenog kao odgovor na pandemiju COVID-19. Partner za podršku ekonomskih aktivnosti će češkim kompanijama pružati stručne usluge u vezi s ulaskom češke kompanije na lokalno tržište, razvojem njenih aktivnosti, pripremom investicije ili rješavanjem mogućih problema. Te usluge mogu uključivati, na primjer, izradu poslovnog plana, izradu pravne ili finansijske analize, podršku u stvaranju mreža dobavljača i kupaca ili promotivne i marketinške usluge. Usluge koje partner pruža platit će Ambasada Republike Češke u Sarajevu u visini od 70%, a 30% češka kompanija koja je naručilac usluga. Cilj programa PROPEA je pružiti češkim kompanijama novi nivo podrške izvan okvira usluga koje obično pružaju Ambasada i agencija CzechTrade. "Bosna i Hercegovina nudi češkim kompanijama brojne mogućnosti, ali to je i tržište na kojem dobro poznavanje lokalnog okruženja igra veliku ulogu. Stručna podrška iskusnog lokalnog partnera, koju će češke kompanije moći koristiti, može na taj način značajno pridonijeti razvoju češko-bosanske ekonomske saradnje", izjavila je ambasadorica ČR u Sarajevu Ivana Hlavsova.

## PREDSTAVLJENA STUDIJA "STUDENTSKA PRAKSA U ZEMLJAMA EVROPSKE UNIJE – PRIJEDLOG MODELA ZA BIH"

Putem online platforme u Sarajevu je održana javna promocija i prezentacija studije Studentska praksa u zemljama EU – Prijedlog modela za BiH. Na promociji su predstavljeni modeli studentske prakse u čijem kreiranju je učestvovalo i Vijeće stranih investitora u BiH, kao član ERSE mreže. VSI je postao član ERSE (edukacija, reforma, sigurnost i egzistencija) mreže u septembru prošle godine, čiji je cilj da podrži reformu visokog obrazovanja zagovarajući uvođenje redovne studentske prakse, a formirana je u sklopu projekta Studentskom praksom brže do posla, koju finansira Evropska unija. Inače, mrežu čine predstavnici akademske zajednice, poslovne zajednice, studentskih asocijacija i organizacija civilnog društva s ciljem uvođenja redovne studentske prakse, čime se želi doprinijeti većem zapošljavanju kao i ostanku mladih u Bosni i Hercegovini. Studija čija je promocija upriličena, nastala je kao rezultat radionica sa članovima ERSE mreže, koje su održane tokom prve polovine marta ove godine u Sarajevu. Na promociji se učesnicima pozdravnim govorom obratio Vladimir Pandurević Voditelj programa za civilno društvo, EIDHR, kulturu i omladinu pri Delegaciji Evropske unije u BiH i Diana Šehić direktorica, NVO "Prava za sve", koji su inače nositelji projekta. Autorica studije Nina Branković prezentirala je na promociji prijedloge modela studentske prakse koji bi se mogli primjeniti u BiH, nakon čega je održana diskusija sa učesnicima.

## SASTANAK SA NOVIM GENERALNIM SEKRETAROM AMCHAM BIH

Izvršna direktorica VSI, Sanja Miović održala je sastanak sa gospodinom Nedimom Hamzićem novim Generalnim Sekretarom Američke trgovačke komore u BiH (AmCham BiH), nevladine organizacija i dijela evropske i svjetske mreže AmChamova, čiji je zadatak da uspostavi platformu putem koje će se razvijati poslovne prilike za članice i promovirati visoki standardi poslovne prakse i jačati partnerstva između poslovne zajednice i bh. vladinih tijela na svim nivoima. Teme sastanka bile su predstavljanje novih internih izmjena i novoizabranog menadžmenta AmCham BiH te jačanje dosadašnje saradnje ovih organizacija. Gospodin Hamzić dodao je da je AmCham BiH u proteklom periodu podlegla određenim internim promjenama u strukturi i organizaciji. Pored osvježene i redefinisane misije i vizije AmCham BiH kao i novog strateškog pristupa u radu, na sastanku je istaknuto da ova organizacija u svom planu rada ima u fokusu i produbljivanje suradnje sa VSI BiH, naročito uzme li se u obzir da su neke od najuspješnijih kompanija u članstvu i jedne i druge organizacije. Oba predstavnika su zaključila da buduće zajedničke aktivnosti trebaju biti fokusirane na konkretne potrebe njihovih članica.



## VSI U SARADNJI SA GIZ GMBH ORGANIZOVAO WEBINARE O PROGRAMU DEVELOPPP.DE

Kao rezultat dugogodišnje suradnje između Vijeća stranih investitora u BiH i Njemačkog društva za međunarodnu saradnju (GIZ GmbH), od februara 2021. godine VSI je organizirala za svoje članove seriju informativnih webinarâ na kojim su predstavljene mogućnosti razvojne saradnje s privatnim sektorom kroz develoPPP.de program. Cilj webinarâ je steći prve dojmove o develoPPP.de programu, šta GIZ nudi privatnim firmama putem ovog programa, koji su kriteriji za učešće, kako se prijaviti i drugo. 'Privatni sektor je pokretač razvoja, posebno u zemljama jugoistočne Evrope. No, ponekad se firme suočavaju s izazovima prilikom promovisanja inovativnih projekata i komercijalnih ulaganja a sve u cilju postizanja održivog rasta. Tu se interesi firmi i njemačke razvojne saradnje ukrštaju, a najbolji rezultati se postižu udruživanjem snaga i partnerskim odnosom', – pojasnili su iz sarajevskog ureda GIZ GmbH o programu develoPPP.de. Pokrenut od njemačkog Saveznog ministarstva za ekonomsku suradnju i razvoj (BMZ), develoPPP.de program nudi jednostavan i atraktivan način podrške kojim se poslovni izazovi mogu pretvoriti u razvojne mogućnosti. Udruživanje snaga s njemačkom razvojnom saradnjom stvara win-win situaciju koja koristi kako firmama, tako državi, i naposljetku njenim građanima. Saradnja sa privatnim sektorom nudi Njemačkom društvu za međunarodnu saradnju (GIZ GmbH) velike mogućnosti za mobilizaciju dodatne ekspertize i resursa u postizanju razvojnih ciljeva zemalja partnera. Razvojna partnerstva s privatnim sektorom postaju sve važnija s aspekta dinamičnog i sinergijskog razvoja GIZ-ovog portfolija u regiji.

## VSI UČESTVOVAO U FOKUS GRUPI SVJETSKJE BANKE O UTJECAJU COVID-A NA RJEŠAVANJE PRIVREDNIH SPOROVA

Tim Svjetske banke u BiH koji radi na 'Projektu tehničke pomoći za privredno pravosuđe u Bosni i Hercegovini', organizirao je fokus grupu za advokate iz Bosne i Hercegovine koji aktivni u oblasti privrede, među kojima su se našla i advokatska društva koji su članovi FIC-a, poput: Dimitrijević & Partners, Marić & Co, CMS Reich-Rohrwig Hainz, Wolf Theiss, DMB Legal i Karanović & Partners. Generalne teme za diskusiju na ovoj fokus grupi bile su sljedeće: a) uticaj COVID pandemije na rad sudova u BiH i b) uticaj COVID pandemije na privredu – pravni aspekti i najčešća pravna pitanja. Na pomenute teme advokati su diskutovali i podijelili informacije o svojim dosadašnjim iskustvima. Fokus grupa je održana kao online jednočasovni sastanak. Inače, cilj ovog Projekta je podržati pravosudne institucije u implementaciji reformi kojima se poboljšava efikasnost i pristup privrednom pravosuđu u BiH, nadovezujući se na preporuke Studije izvodljivosti o unapređenju upravljanja privrednim predmetima u Federaciji Bosne i Hercegovine (FBiH) iz 2016. godine koju je finansirala vlada Velike Britanije. Projekt se sastoji od pet komponenti: (1) jačanje privrednih odjeljenja i privrednih sudova u FBiH i RS; (2) ubrzanje rješavanja sporova male vrijednosti na osnovu rezultata komparativne pravne analize parničnog postupka u BiH i u nekoliko zemalja Evropske unije; (3) povećanje pristupa pravosuđu za mikro, mala i srednja preduzeća (MMSP-ovi) putem izrade vodiča za povećanje pravne pismenosti među firmama; (4) izgradnja kapaciteta kroz razvoj i implementaciju kolegijalnog savjetovanja i dodatne edukacije za sudije na privrednom referatu; i (5) provedba procesnih reformi radi zatvaranja praznina i smanjenja uskih grla u procesuiranju predmeta putem prijedloga zakonodavnih izmjena.



## VSI UČESTVOVAO NA KONSULTACIJAMA O PRIORITETIMA I PREPORUKAMA VEZANO ZA IZRADU IFC STRATEGIJE ZA BIH

U martu 2020. godine, prije početka pandemije IFC je završio konsultacije sa stakeholderima sa kojima je razgovarano o detaljnoj socio-ekonomskoj analizi Bosne i Hercegovine, a koja je objavljena u dokumentu pod nazivom „Ažurirana sistematska dijagnostika zemlje“. Nakon urađene analize, cilj IFC-a je bio odmah pristupiti izradi strategije za IFC u BiH za narednih pet godina, 2021 -2025, međutim, novonastale okolnosti su poremetile prvobitni raspored. IFC je krajem 2020. godine konačno započeo pripremu nove strategije a time i konsultacije sa predstavnicima realnog sektora o prioritetima i preporukama vezano za izradu IFC strategije, među kojima su se našli i predstavnici VSI. Rad na pripremi strategije je vrlo važan trenutak koji će definirati područja na koja će se fokusirati rad IFC-a u narednih pet godina te utvrditi na koji način IFC može biti od pomoći u razvoju privatnog sektora u zemlji. „Dok definiramo naš budući program, želimo osigurati da djelujemo u onim područjima gdje je naš doprinos najpotrebniji i gdje naš rad može biti najuticajniji“, – istakli su ispred tima IFC u BiH.


## VSI DOSTAVIO INPUTE ZA OECD "SEE COMPETITIVENESS OUTLOOK 2021"



Uprkos situaciji sa COVID-19 virusom, OECD (eng. Organisation for Economic Co-operation and Development) je započela aktivnosti u vezi sa novim ciklusom procjene konkurentnosti u zemljama zapadnog Balkana 'SEE Competitiveness Outlook 2021', obzirom da se planirane aktivnosti trenutno mogu obavljati online putem. Procjena konkurentnosti ekonomija zemalja Zapadnog Balkana (Srbija, BiH, Crna Gora, Sjeverna Makedonija, Kosovo i Albanija) za 'SEE Competitiveness Outlook 2021' trajat će tokom 2020. godine, zaključno sa februarom 2021. godine, a objava konačne publikacije planirana je za ljeto 2021. godine. U kontekstu trenutne situacije koja u velikoj mjeri pogađa sve ekonomije u svijetu, ove OECD procjene konkurentnosti ekonomija zemalja Zapadnog Balkana imat će sigurno značajno mjesto u planovima za oporavak privrede u narednom vremenu. Nadležne institucije BiH, među kojima je i Vijeće stranih investitora, do sada su aktivno učestvovala u dva prethodna ciklusa procjene Competitiveness Outlook-a za 2016. i 2018. godinu. S tim u vezi, VSI je kao jedan od sudionika koji su uključeni u novi ciklus procjene dostavio svoje inpute koordinatorima iz Ministarstva vanjske trgovine i ekonomskih odnosa BiH, a koji će objedinjeni biti dostavljeni OECD službama. Procjena konkurentnosti za 'SEE Competitiveness Outlook 2021' ovaj put obuhvata ukupno 16 oblasti (dimenzija) koje su ključne za konkurentnost privrede. U tom smislu, VSI je dostavio inpute za dimenziju 'Investment Policy and Promotion'.

## VSI PODRŽAO 'SARAJEVSKE DANE ARBITRAŽE'

Šesti sarajevski dani arbitraže održani su online 23. oktobra 2020. godine. Ovogodišnji Sarajevski dani arbitraže bili su posvećeni arbitražnoj praksi u toku COVID-19 pandemije i prilikama koje se javljaju uprkos izazovima. Svjetski priznati stručnjaci poput Gary Borna (Wilmer Hale), Muhammada Abdel Wahab (Zulficar & Partners Law Firm), Lucy Greenwood (Greenwood Arbitration) i mnogi drugi, govorili su o online arbitraži, raznolikosti među arbitrima, regionalizaciji u međunarodnoj arbitraži, zaštiti okoliša i drugim interesantnim temama. Vijeće stranih investitora BiH je i ove godine finansijski podržala ovaj događaj koji se održava svake godine u organizaciji Udruženja Arbitri.







**VSI GODIŠNJAK 2020/2021**

Izdavač: Vijeće stranih investitora  
Uredništvo: Ured VSI

**VSI – Vijeće stranih investitora**

Fra Anđela Zvizdovića 1/B14,  
71 000 Sarajevo, BiH  
Tel: +387 33 295-880  
Fax: +387 33 295-889  
[www.fic.ba](http://www.fic.ba) [info@fic.ba](mailto:info@fic.ba)